

Betico e Lider

El a lucha contra e sistema qu tabata existi
den cual su pueblo no tabata conoce libertad,
el a lucha contra e traidornan qu tabata persisti
y qu tabata actua manera bende patria den scuridad.

Sin ningun duda el tabata e unico gran mensahero
qu a nace inspirá y qu tabata ser guiá pa Dios,
y cu e perseverancia di un autentico bocero
el a defende su patria cu e firmeza di su boz.

El a cruza e fronteranan buscando e reconocimiento
pa e lucha sagrado di su pueblo pa libertad,
y como un bon Arubano patriótico den tur momento
el a logra su meta cu inteligencia y capacidad.

Betico, e gran lider di nos pueblo Arubano
e amor pa su patria tabata su credo, su ambicion,
el a prepará e independencia pa un futuro cercano
pasobra el a biba cu su patria den su curason.

El a bira e victima di un bala traicionero
qu a laga den su pecho un herida fatal
y murmurando cu un acento tristo y lastimero
“esaki ta mi danki, acaso ya mi no ta leal?”

El a regresa recuperá despues di tabata ausente
y cu mas brio y animo el a bolbe tuma e standarte,
pasobra e lucha di su pueblo stimá tabata vigente
y ningun paso atras, Aruba mester haya su Status Aparte.

Eleccion a tuma lugar pa formacion di un gobierno
pero su pueblo qu den pasado a duné aclamacion
a lague cay, y di e dia ey su bida a bira un fierno
mirando e ingratitud, un golpi qu a afectá su curason.

El no a biba ni pa contemplá e bunita aurora
di un mainta nobo den e historia di su patria,
pasobra un accidente fatal a sorprendé den e ora
qu el kier a mira su pais den su promer dia.

El no tabata tin gozo, descanso ni gloria
apesar di e desengaño el a muri cu satisfaccion
di por a logra pa su pueblo e libertad, e victoria
qu tabata e deseo profundo di su curason.

El a bandona e mundo aki sin perde su noblesa
di por a ranca e arbol colonial cu tur su raiz
cumpliendo cu e mandato di su pueblo, y cu grandesa
el a comberti su Aruba stimá den un Pais.